

Director di DOW Marlon Croes ta coregi informacion erroneo duna door di Ecogas

ORANJESTAD (AAN): E siman aki a tuma nota di un articulo publica den cual ta bisa cu Gobierno a tolera pa por benta sushi den un buraco grandi na Moko den caso di e restonan di Bushiri.

Pesey director di DOW Marlon Croes ta reacciona riba e ponencianan den e articulonan aki. Mester enfatisa cu den e proyecto cu a tuma lugha di 'sloop' ex Bushiri Hotel, diferente medida a tuma lugha y den e caso aki, Van den Broek tabata e contratista cu a sloop Bushiri Hotel.

Pa a realisa e trabao aki, a haci un RIE, cual ta un Risco Inventarisatie Evaluatie di e materialnan cu tin na ex Bushiri hotel. Pa di e forma aki determina cua ta e materialnan cu ta peligroso pa salubridad publico. A base di esey a dicidi riba e medidanan cu a tuma pa atende cu ne.

Por ehempel na Bushiri tabatin asbestos y conhuntamente cu Directie Technische Inspecties (DTI), Directie Natuur en Milieu (DNM) y Dienst Volksgezondheid (DVG),

a traha un planificacion di trabao di cual e contratista Van den Broek, lo mester a remove e asbest aki, y materialnan cu por ta dañino pa nos salubridad.

Un proceso concreto a worde haci y banda di cu DOW a supervisa e trabao, tabatin profesional tecnico di sector priva cu tabata specialisa riba 'asbest

verwijdering', cu a guia e proceso pa Van den Broek, sr. Croes a spli-ca. Conforme procedimiento a empaketa esakinan den material cu ta seya nan, deposita den container y hiba Parkietenbos, unda cu tambe a deshaci di esakinan conforme procedura.

Pa loke ta trata e 'bouw puin' cu a keda, esaki tambe mester a worde hiba Parkietenbos. Sinembargo e contratista den inicio no a haci esaki. Segun sr. Croes unabes cu



a descubri cu nan a hiba esaki na Moko den forma ilegal, a reuni cu e contratista pa cual a hala su atencion y a splike di e consecuencia cu esaki por tin p'e. E contratista mester a coregi e situacion y percura pa e bouw puin worde hiba Parkietenbos.

Sr. Croes a enfatisa cu den cuadro di e maneho nobo cu tin di Minister di Infraestructura, no ta permiti pa tin lugarnan di dump ilegal. Esey ta trece cu ne cu tur cos mester worde hiba pa Parkieten-

bos, como e dump apunta legalmente. Den trabao (sloop werk) diario di DOW, esaki ta worde haci y materialnan dañino ta worde hiba Parkietenbos. Materialnan cu por worde reuza ta worde hiba na e 'depot'.

E depot ta na Gavilan, unda cu ta saca granito, pa cual Minister encarga cu Infraestructura Otmar Oduber a anuncia, cu tur cobamento mester para na Aruba y a duna un periodo pa companianan 'bouw af'. Cu e meta pa comienso di 2021, no tin mag di tin cobamento mas na Aruba pa sector priva y tampoco Gobierno. E team di DOW ta haciendo estudio den regio pa mira unda por haya materialnan cu por substitui granito pa por cera e operacion di coba granito pa 2021 na Aruba. Pesey aworaki DOW ta uza Gavilan como un lugar pa warda material/ articulonan cu ta reuzabel, sr. Croes a finalisa.